

ОКТОВРИЯ В 18-Й ДЕНЬ.

СВЯТАГО АПОСТОЛА И ЕВАНГЕЛИСТА ЛУКИ.

НА ВЕЧЕРНИ

Блажен муж: первый антифон

На Господи, воззвах: стихиры на 8, глас 8-й:

Что ты ныне нареку, апостоле: * небо, яко славу Божию поведал еси, * блистание, яко мир озаряеши светом, * облак, одождяющъ Божественныя воды, * чашу мудрости Божественнейшую, * вино нам источающую, * сердца веселящее. * Моли спастися душам нашим.

Что ты ныне нареку, Богоприятне, * кивот златый завета, * егоже завета Христос, реку, * из рая истекающую нам, светило, * умный свет просиявающее, светильник, * Церковь всю осиявающий, * хлеб жизни Божественныя трапезы, * кратир духовнаго пива. * Моли спастися душам нашим.

Что ты ныне, Боговидче, наречем, * служителя таин деятельнейшаго Христовых, * Скинии мысленныя началохудожника мудра, * скрижали изсекающаго благодати, * закон написавшаго новейший, * от Сиона происходящий и тобою проповедуемый, * Моли спастися душам нашим.

Что ты ныне наречем, славне, * сокровище Небесных даров твердое, * врача душ и телес известна, * Павлова содейственника и сошественника, * деяния Апостольская излагающа. * Многая, Луко, имена добродетель тебе сотвори, * Моли спастися душам нашим.

Что ты ныне, Богоглаголиве, провещаю, * ученика, яко нам благовествовал еси Христа, * врача, яко страсти исцеляеши душевныя, * светильника, умный свет облиставшаго, * степень и основание веры, * ты бо нам написал еси честное Евангелие. * Моли спастися душам нашим.

Что ты ныне нареку, чудне, * зрителя мудрости учений нежлива, * писателя деяний апостольских учений, * или столпа благочестия непоколебима, * или стену Церкви неразрушимую. * Многая твоя, Луко, имена и большая дарования, * моли спастися душам нашим.

Слава, глас 6. Анатолия.

Апостоле Христов и Божественных догматов писателю, * и церковное утверждение: * ты яко истинно сущия во мраце неведения сердца, * зашедшия во глубину отчаяния уврачил еси боговещаньми, * и спасл еси, яко от бури треволнения, * последователь быв сосуда избраннаго Павла и ученик. * Тем молим тя, Луко досточудне, * Антиохианом удобрение, * молися Спасу и Богу * о иже верою совершающих присно честную память твою.

И ныне, Богородичен, глас тойже.

Кто Тебе не ублажит, Пресвятая Дево? * Кто ли не воспоет Твоего Пречистаго Рождества? * Безлетно бо от Отца Возсиявый Сын Единородный, * Тойже от Тебе, Чистыя, * пройде, неизреченно воплощся: * естеством Бог Сый и естеством быв Человек нас ради; * не во двою лицу разделяемый, * но во двою естеству неслитно познаваемый. * Того моли, Чистая Всеблаженная, помилуватися душам нашим.

Вход. Прокимен дне и чтения три.

Соборнаго послания Иоаннова чтение (глава 1):

Еже бе исперва, еже слышахом, еже видехом очима нашими, еже узрехом, и руки наша осязаша, о Словеси Животнем. И Живот явися, и видехом, и свидетельствуем, и возвещаем вам Живот Вечный, Иже бе у Отца и явися нам. Еже видехом и слышахом, поведаем вам, да и вы общение имате с нами: общение же наше со Отцем и с Сыном Его, Иисусом Христом. И сия пишем вам, да радость ваша будет исполнена. И сие есть обетование, еже слышахом от Него и поведаем вам, яко Бог Свет есть, и тмы в Нем несть ни единыя. Аще речем, яко общение имама с Ним, и во тме ходим, лжем и не творим истины. Аще же во свете ходим, якоже Сам Той есть во свете, общение имама друг ко другу, и Кровь Иисуса Христа Сына Его очищает нас от всякаго греха.

Соборнаго послания Иаковля чтение (глава 1):

Иаков, Богу и Господу Иисусу Христу раб, обеманадесяте коленома, иже в разсеянии, радоватися. Всяку радость имейте, братие моя, егда во искушения впадаете различна, ведяще, яко искушение ваша веры соделовает терпение. Терпение же дело совершенно да имать, яко да будете совершени и всецели, ни в чемже лишени. Аще же кто от вас лишен есть премудрости, да просит от дающаго Бога всем нелицеприемне и не поношающаго, и дастся ему. Да просит же верою, ничтоже сумняся: сумняйся бо уподобися волнению морскому, ветры возметаему и развеваему. Да не мнит бо человек он, яко примет что от Бога. Муж двоедушен, неустроен во всех путех своих. Да хвалится же брат смиренный в высоте своей, богатый же во смирении своем, зане, якоже цвет травный, мимоидет. Возсия бо солнце со зном и изсуши траву, и цвет ея отпаде, и благолепие лица ея погибе. Сице и богатый в хождении своем увядает. Блажен муж, иже претерпит искушение, зане искусен быв, примет венец жизни, егоже обеща Бог любящим Его.

Соборнаго послания Иудина чтение (глава 1):

Иуда, Иисусу Христу раб, брат же Иакову, сущим о Бозе Отце освященным, Иисус Христом соблюденным званым. Милость вам, и мир, и любви да умножится. Возлюбленнии, всяко тцание творя писати вам о общем спасении вашем, нужду возимех писати вам, моля подвизатися о преданней вере святым единою. Привнидоша бо нецыи человецы (древле предустановленнии на сие осуждение) нечестивии, Бога нашего благодать прелагающии в скверну и Единого Владыки Бога, и Господа нашего Иисуса Христа отметающися. Воспомянути же вам хошу, ведущим и вам единою сие, яко Господь люди от земли египетския спасе, последи неверовавшия погуби. Ангелы же, не соблюдшия своего начальства, но оставльшия свое жилище на суд великаго дне, узами вечными под мраком соблюде. Якоже Содомы и Гоморры, и окрестный их грады, подобным им образом преблудивше и ходивше в след плоти инья, предлежат в показание огня вечнаго, суд подъемше. Вы же, возлюбленнии, поминайте глаголы преждереченныя от апостол Господа нашего Иисуса Христа. Зане глаголаху вам, яко в последнее время будут ругатели, по своим похотех ходяще и нечестиих. Сии суть отделяюще себе (от единости веры и суть) телесни, Духа не имущи. Вы же, возлюбленнии, святою вашею верою назидающе себе, Духом Святым молящися, сами себе в любви Божией соблюдайте, ждуще

милости Господа нашего Иисуса Христа в жизнь вечную. И овех убо милуйте, разсуждающе, овех же страхом спасайте, от огня восхищающе. Обличайте же с боязнию, ненавидяще и яже от плоти оскверненую ризу. Могущему же сохранить вы без греха и без скверны и поставити пред славою своею непорочных в радости, Единому Премудрому Богу и Спасу нашему (Иисусом Христом, Господем нашим), слава и величие, держава и власть прежде всего века, и ныне, и во вся веки. Аминь.

На стиховне стихиры, глас 5-й.

Подобен: Радуйся, постников:

Благодать устнам твоим, Луко, * огненным языком излился, Апостоле, * и язык огненный показался еси, * словеса испущая света, * света достойным проповеданием, * стрелы же палящая тьмы желающим, * пища и уча честное Евангелие, * и воня жизненная Жизни воистинну * хотящим явился еси, * якоже Павел рече, * егоже имел еси учителя: * воня же смерти паки жизнь не возлюбившим. * Но нам мир и Жизнь и свет подаждь * и велию милость.

Стих: Небеса поведают славу Божию, * творение же руку Его возвещает твердь.

Познахом от словес твоих, * якоже рекл еси, * словес утверждение, яже рекл еси, * Божественне таинниче, * понеже писати нам о вещех начал еси, * о нихже извещен был еси, * и якоже тебе предаша, * иже исперва самовидцы; * имже и ты равен был еси, * служитель Слова воплощения, * Егоже по восстании во Еммаусе видел еси * и горящим сердцем с Клеопою хлеб ял еси. * Того Божественныя теплоты * и наша чтущих тя души исполни.

Стих: Во всю землю изыде вещание их * и в концы вселенныя глаголы их.

Радуйся един, написавый нам, * еже радуйся, радуясь, Чистыя Благовещение, * и Сию Господородительницу, * рекша Крестителя из чрева, * егоже написав и зачатие, * и Слова воплощение, * искушения же и чудеса, словеса и Страсти, * Крест и смерть и Восстание, еже видел еси, * и Восход, Духа же Сошествие, проповедник же деяния, * и изряднее же Павлова, * егоже показался еси сошественник, * врач же и таинник, и светильник Церкви, * юже соблюдай всегда.

Слава, глас 6:

Всемудрый ловче, * святой учениче, * делателю Спасов и проповедниче Того Страстей, * иже тварь верою претекый * и от прелести языки собрав, * и Богу привед, яко воню добру, * на Небеса постигл еси. * Тем, предстоя Судии всех, * молися, избавити ны от беззаконий наших * и в день Суда освободитися от муки.

И ныне, Богородичен воскресен:

Творец и Избавитель мой, Пречистая, * Христос Господь, * из Твоих ложесн прошед, * в мя оболкийся, первыя клятвы Адама свободи: * темже Ти, Всечистая, * яко Божии Матери же и Деве воистинну, * вопием немолчно: * радуйся, Ангельски, радуйся, Владычице, * Предстательство и Покрове * и Спасение душ наших.

Посем, Ныне отпускаеши: Трисвятое. И по Отче наш:

Тропарь, глас 5-й:

Апостольских деяний сказателя и Евангелия Христова * светла писателя, * Луку препетаго, * славна суца Христове Церкви, * песньми священными святаго Апостола похвалим, * яко врача суца, * человеческия немощи, * естества недуги * и язи душ исцеляюща * и молящися непрестанно за души наша.

Слава, и ныне, Богородичен воскресен:

Радуйся, Двере Господня непроходимая, * радуйся, Стено и Покрове притекающих к Тебе, * радуйся, необуряемое Пристанище * и Неискусобращная, * Рождающая плотию Творца Твоего и Бога, * молящи не оскудевай о воспевающих, * и кланяющихся Рождеству Твоему.

НА УТРЕНИ

На Бог Господь: тропарь глас 5-й:

Апостольских деяний сказателя и Евангелия Христова * светла списателя, * Луку препетаго, * славна суца Христове Церкви, * песньми священными святого Апостола похвалим, * яко врача суца, * человеческия немощи, * естества недуги * и язи душ исцеляюща * и молящися непрестанно за души наша. [Дважды].

Слава, и ныне, Богородичен:

Радуйся, Двере Господня непроходимая, * радуйся, Стено и Покрове притекающих к Тебе, * радуйся, необуреваемое Пристанище * и Неискусобрачная, * Рождающая плотию Творца Твоего и Бога, * молящи не оскудевай о воспевающих, * и кланяющихся Рождеству Твоему.

По 1-й стихологии, седален, глас 3:

Приидите вси, апостола Луку восхвалим, яко кормчия, * идольскую бо леть упраздни и к Свету жизни возведе, * и в Троицу веровати научи. * Темже днесь благочестно того почитающе вернии, * славим Христа Бога нашего.

Слава, и ныне, Богородичен:

Радуйся, Марие, Дево Мати, * горо святая, Едемский раю, * из Неяже родися Христос Бог, * Безсеменное Слово, * Имже Жизнь миру прозябе.

По 2-й стихологии, седален, глас 3.

Подобен: Красоте девства:

Путешествовав ты по востании, Луко всесвященне, * с Клеопою прочее во град Еммаус, * вопрошение творящу ти, предста Господь образом прикровен, * абие же прием хлеба подание, познал еси Спаса: * Егбже моли даровати нам велию милость.

Слава, и ныне, Богородичен:

Яко невозделанная, Дево, лоза, краснейший Гроздь прозябла еси, * источающ нам Вино спасения, * всех веселящее души же и телеса. * Темже яко вину Тя добрых блажаще присно, * со Ангелом вопием Ти: * радуйся, Обрадованная.

По полиелеи седален, глас 4:

Премудрости ловительною тростию, умнаго моря глубину возчерпая, * из смертоносных глубины верных души живоуловил еси, Луко всеблаженне. * Темже от Павла научен, все очистил еси твое сердце осиянием Духа * и догматами твоими языки просветил еси, * страстей недугования чудесы исцелил еси, * Христа Бога за ны присно моля * спастися душам нашим.

Слава, и ныне, Богородичен:

Имуще Тя, Богородице, упование и предстательство, * вражних навет не убоимся, * яко спасаеши души наша.

Степенна, 1-й антифон 4-го гласа.

Прокимен, глас 4: Во всю землю изыде вещание их, и в концы вселенныя глаголы их.

Стих: Небеса поведают славу Божию, творение же руку Его возвещает твердь.

Всякое дыхание:

Евангелие от Иоанна, зачало 67.

Во время оно, явися Иисус учеником Своим, востав от мертвых. И глагола Симону Петру: Симоне Ионин, любиши ли Мя паче сих? Глагола Ему: ей, Господи, Ты веси, яко люблю Тя. Глагола ему: паси агнцы Моя. Глагола ему паки второе: Симоне Ионин, любиши ли Мя? Глагола ему: ей, Господи, Ты веси, яко люблю Тя. Глагола ему: паси овцы Моя. Глагола ему третие: Симоне Ионин, любиши ли Мя? Оскорбе же Петр, яко рече ему третие, любиши ли Мя; и глагола Ему: Господи, Ты вся веси, Ты веси, яко люблю Тя. Глагола ему Иисус: паси овцы Моя. Аминь, аминь, глаголю тебе, егда бе юн, поясахся сам, и хождаше, аможе хотяше, егда же состареешися и воздежеш руце твои, и ин тя пояшет, и ведет, аможе не хоцеш. Сие же рече, назнаменуя, коею смертию прославит Бога. И сия рек, глагола ему: иди по Мне. Обращься же Петр, виде ученика, егоже любляше Иисус, во след идуща, иже и возлеже на вечери на перси Его, и рече: Господи, кто есть предай Тя? Сего видев Петр, глагола Иисусови: Господи, сей же что? Глагола ему Иисус: аще хощу, да той пребывает, дондеже прииду, что к тебе? Ты по Мне гряди. Изыде же слово се в братию, яко ученик той не умрет, и не рече ему Иисус, яко не умрет, но аще хощу тому пребывати, дондеже прииду, что к тебе? Сей есть ученик свидетельствующий о сих, иже и написа сия, и вем, яко истинно есть свидетельство его. Суть же и ина многа, яже сотвори Иисус, яже аще по единому писана бывают, ни самому мноу всему миру вместити пишемых книг. Аминь.

По 50-м псалме стихира, глас 3:

Путеходив ты по Востании, * Луко всесвященне, со Клеопою * во град убо Еммаус, * совопрошение творящу ти предста Господь, * зраком непознаваемый, * абие же, прием хлеба подавание, * познал еси Спасителя, * Емуже молися даровати нам велию милость.

Канон Богородицы со ирмосом на 6 и апостола на 8, глас 8.

Песнь 1

Ирмос: Песнь возснем, людие, * Чудному Богу нашему, * свободившему Израиля от работы, * песнь победную поюще и вопиюще, * поим Тебе, Единому Владыце.

Колесница Божия пресветлая был еси, Всесвятое нося Имя пред человеки, Луко всечестне, колесницы и тристаты прелести погружая крепко.

Струю приим жизни, зноем изсыхаемый безбожия, напоил еси мир, Луко всеблаженне, тучами Богоразумия, из чрева твоего изскачущими.

Блистанием Духа, Луко, и жития чистотою озаряем, яко молния, треблаженне, Богоданно сиял еси всей вселенней, просвещая верных сердца.

Богородичен: Радуйся, всесвятый храме, руно Богоросное, запечатанный источниче бессмертных Струи, стадо Твое, Владычице, сохраняй от всех ратных непленимо.

Катавасия: Отверзу уста моя:

Песнь 3

Ирмос: Несть свят, яко Господь, * и несть праведен, яко Бог наш, * Егбже поет вся тварь: * несть праведен, паче Тебе, Господи.

Возсияв, яко солнце, проповеданием, Церкви украсил еси, Луко, утверждение, прелести мглу теплотою веры истаив, всеблаженне.

Скрижали изсекл еси Боголепныя от камене, пребогате, Божия воплощения, оскорд имея Божественный язык твой и уста Богодухновенная.

Во облак всесветлый входяй и облаком покрываемь, приял еси, премудре, Новый Закон, перстом Духа писанный на сердца твоем.

Богородичен: Несть непорочны, яко Ты, Владычице, и несть пречисты, паче Тебе, Всенепорочная: во чреве бо Бога Слова вместила еси, Единого Многомилостиваго.

Седален, глас 8.

Подобен: Премудрости:

Яко сошественник Павлов явився, * различныя беды терпеливне претерпел еси, * всехвальне Господень апостоле, * и течение страданием совершив веры, * с ним в вышних веселишися, блаженне. * Тем и миру Христова Евангелие проповедав, * просветил еси подсолнечную всю, Луко всечестне. * Моли Христа Бога грехов оставление подати празднующим любовию святую память твою.

Слава, и ныне, Богородичен:

Солнца облаче разумнаго, * Божественнаго Света светильниче златокованный, * Нескверная, Неблазная, Всенепорочная Владычице, * омраченную душу мою ослеплением страстей * безстрастия зарею просвети, молюся, * и оскверненное мое сердце омой потоки умиления, * покаяния же слезами, * и от тимения²⁷ мя очисти дел моих, да любовию зову Ти: * Богородице Приснодево, моли Христа Бога * прегрешений оставление подати ми, * Тебе бо имею надежду, раб Твой.

Песнь 4

Ирмос: Из горы приосененныя, Слове, пророк, * Единыя Богородицы, * хотяща воплотитися, Боговидно усмотри * и со страхом славословите силу Твою.

Море языков смутил еси, Богомудре, конь быв Всецаря, сланое²⁸ неверствие солию Божественною ослаждая, приснославне.

Лук Христос напряг, пусти стрелу тя, Луко, светло обошрену, лучами сияюща благочестия и просвещающа наша души.

Страсти душ купно и телес твоих певцев врачи, всеблаженне, таинственным рукоделанием, греха гнилость изрезуя, всемудре.

Богородичен: Невесто Божия, Марие Богородительнице, избави мя лютых прегрешений и бед и к тишины пристанищу и спасения Твоими молитвами направи.

Песнь 5

Ирмос: Утреннююще вопием Ти, * Господи, спаси ны, * Ты бо еси Бог наш, * разве Тебе иного не вемы.

Яко роса с Небес спадающе, явился еси, прелести зной разоряя словесы твоими.

Срах во чреве твоем Божественный зачен, спасение породил еси заблуждшим, апостоле.

На гору возшед, всеблаженне, добродетелей, всем Евангелие Царствия проповедал еси.

Богородичен: Марие, Богородице Безвестная, надежды врагов суетны сотвори и поюция Тя возвесели.

Песнь 6

Ирмос: Ризу мне подаждь светлу, * одеяйся Светом, яко ризою, * Многомилостиве Христэ Боже наш.

Мудрости чашу испив, напоил еси всех познания Спаса Христа, Луко всемудре.

Павлу соисходник избрався, Луко всеблаженне, языки уловил еси мрежею, Богоглагольниче, догматов твоих.

Облак, тучу жизни нам одождяющь, явился еси, апостоле, от источник спасения истекающую.

Богородичен: Кумиров Разрушитель яко Бог бывшее Рождество Твое, Марие Богоневесто, покланяемо есть со Отцем и Духом.

Кондак, глас 2:

Подобен: Твердыя:

Истиннаго благочестия проповедника * и таин неизреченных ритора, * звезду церковную, Луку Божественнаго восхвалим: * Слово бо его избра, с Павлом мудрым языков учителя, * Един ведый сердечная.

Икос: Знанием обогатився Горнейшим от руки Владычни, вручен был еси языков жребиюимуществу, всехвальне. Тем, житие распалив Словом, странам законоположник, Луко, явился еси, паче Моисея: перстом Божиим, яко скрижали Богоначертанныя, тобою сложившася Духом, Божественную уяснил еси веру. Тем и Христос тя прослави, Един ведый сердечная.

Песнь 7

Ирмос: Отроцы Богочестивии в Вавилоне * образу златому не поклонишася, * но посреде печи огненныя орошаеми, * песнь воспеваху, глаголюще: * превозносимый отцев и нас Боже, благословен еси.

Ученик неизреченных таин Христа Бога верен быв, Евангелие Сего Божественное проповедал еси верным, всемудре, глаголющим: превозносимый отцев и нас Боже, благословен еси.

Утворении добродетелей украшен явился еси, Луко всеблаженне, Божественнаго благолепия зарями просвещаемь, и вопия непрестанно Творцу твоему: превозносимый отцев и нас Боже, благословен еси.

Испущая светоносныя лучи, якоже в нощи заря являемь, прелести тьму сиянием словес твоих, благочестно взывая, отгнал еси: превозносимый отцев и нас Боже, благословен еси.

Богородичен: Имея житие, словом, Боговидче, мудрости просвещено, Луко, Девы Рождество явственнo исписал еси и иконами любезно вообразил еси: Ейже покланяемся верно, Христа славяще.

Песнь 8

Ирмос: На горе святей прославльшася * и в купине огнем * Приснодевы Моисеови тайну явльшаго, * Господа пойте * и превозносите во вся веки.

Росодательною мудростию словес твоих и тучами благодати Божественныя прелести печь погасил еси, вестник Господень и священнопроповедник, Богомудре, быв.

Яко красныя ноги твоя, всеблаженне, мир благовествующаго, всяк ум преизвестно преимущ, Егоже превозносим и славословим во веки вся.

Свет мира просвещати во тьме седящая яви тя Христос, отча Существа Сияние, Господь Славы, Егóже превозносим во веки.

Богородичен: Во утробе вселившагося Девы и от Нея страшно и паче слова древняго Адама обновившаго Господа поем и славословим во веки.

Песнь 9

Ирмос: Тя, Неискусобращную Матерь Бога Вышняго, * Тя, паче ума рождшую Словом воистину Бога, * вышшую Пречистых сил, * немолчными славословении величаем.

Проповедник был еси всемирнаго спасения Евангельским проповеданием, священная же и благознаменитая труба, вдохновением дышущи Духа, показался еси, священноглагольниче всечестне.

Деянии украшаемь Спасовых апостолов, сия от Бога подвижим, верным написал еси, якоже образ одушевленный, присно пребывающ, объявив, священнопроповедниче всеславне.

Стал еси убо, Луко, якоже постиг, Богоначальниче, желаний крайнейшее, Христу бо предстал еси, подаемаго от Него насыщаяся Боговидения. Темже ты вси ублажаем.

Богородичен: Тя, Неприступнаго Бога носившую на объятиих, на Небесех поемаго от всякия силы и Тобою нам дарующа всегда спасение, Богомати, величаем.

Светилен.

Подобен: Со ученики:

Луко, Христов апостоле, таинниче неизреченных и языков учителю * с Павлом Божественным и Пречистою Богородицею, * Еяже Божественную икону от любве изобразил еси, * моли, Боговидче, о нас, блажащих ты * и совершающих священное твое усение, всемудре тайноглагольниче.

Слава, ин.

Подобен: Духом во святылици:

Яко ученика благодати и споследователя Павлова, * и словописца изящнейша Божественнаго Евангелия похвалим; * Слова бо воплощение и вочеловечение, и Страсти, блаженне, проповедал еси. * Тем сошедшея верно, Луко, достойно ты почитаем.

И ныне, Богородичен:

Неизреченно бысть рождение Пренепорочныя Невесты, * яко бывши чистейший храм, Богородице, * Советом бо Превечным в Тя Всельшася, * родила еси Бога Слова. * Тем поюще Рождество Твое, * величаем достойно, Всенепорочная.

На хвалитех стихиры, на 4, глас 1.

Подобен: Облак Тя света:

Христова ученика, Евангелия писателя мудрейша, * сосуда избранна красна, * образ одушевлен, верний, * егóже во всех церквах похвала, * Луку апостола в песнях почтим, * той бо проповеда Божия преславная чудеса, * просветив яже на земли Богословия лучами, * благости ради.

Душ врачевству, паче телес научився хитрости, мудре, * и обоюду вседобр показался еси, * Божиею мудростию вдохновен; * еуже врачюя души же и телеса, Луко всеблаженне, * призываеши к познанию, восперяеши к желанию Божию, * человеки всегда возводиши на Небо, * и о всех молишися, восхваляющих тя.

Удицею словесною, * яже во глубине неведения, * яко рыбы, внутрь вшедшия, * привлекл еси к познанию Божию; * Христу пищу добру принесл еси, всеблаженне, * честь достождную, жизнь нетленную, Луко священнейший. * Тем и апостол Христов был еси, мудрый благовестник, * сказатель деятельных дел благодати.

Глас 8. Леонга магистра:

Приидите, вся тварь, * истинно врача духовнаго * и Спасова ученика, Луку приснопамятнаго, * песньми похвалим: * сей бо безбожия недуг * помазанием Христовы купели уврачева, * и реками Боготочных вод от уст, * одушевленная села Евангелия напои. * Тем изыде пророчески вещание его во вселенную, * и молится спастися душам нашим.

Слава, глас тойже:

Давидски, сошедшеся, вернии, * в песнях тайному витии Слова, Луце воззовем: * язык твой трость писменника явися, * Христа Скорописца украшая зраки, * к разуму языков Божественнаго познания; * в немже проповедал еси Евангелие * и купно апостолов Деяния списав. * Тем, предстоя Троице и Богу, * молися о душах наших.

И ныне, Богородичен:

Владычице, прими молитвы раб Твоих * и избави нас * от всякия нужды и печали.

Славословие великое и отпуст.

НА ЛИТУРГИИ

Блаженны, от канона апостола песни 3-я и 6-я.

Возсияв, яко солнце, проповеданием, Церкви украсил еси, Луко, утверждение, прелести мглу теплотою веры иставив, всеблаженне. [Дважды.]

Скрижали изсекл еси Боголепныя от камене, пребогате, Божия воплощения, оскорд имея Божественный язык твой и уста Богодухновенная.

Во облак всесветлый входяй и облаком покрываемь, приял еси, премудре, Новый Закон, перстом Духа писанный на сердца твоем.

Мудрости чашу испив, напоил еси всех познания Спаса Христа, Луко всемудре.

Павлу соисходник избрався, Луко всеблаженне, языки уловил еси мрежею, Богоглагольниче, догматов твоих.

Слава: Облак, тучу жизни нам одождяюще, явился еси, апостоле, от источник спасения истекающую.

И ныне: Богородичен: Кумиров Разрушитель яко Бог бывшее Рождество Твое, Марие Богоневесто, покланяемо есть со Отцем и Духом.

Прокимен, глас 8: Во всю землю изыде вещание их и в концы вселенныя глаголы их.

Стих: Небеса поведают славу Божию, * творение же руку Его возвещает твердь.

Апостол к Колоссаем, зачало 260, от полу.

Братие, в премудрости ходите ко внешним, время искупующе. Слово ваше да бывает всегда во благодати, солию растворено, ведети, како подобает вам единому комуждо отвещавати. Иже о мне, вся скажет вам Тихик, возлюбленный брат и верен служитель и соработник о Господе, егоже послах к вам на се истое, да разумеет яже о вас и утешит сердца ваша, со Онисимом, верным и возлюбленным братом нашим, иже есть от вас, вся вам скажут, яже zde. Целует вы Лука врач возлюбленный, и Димас. Целование моею рукою Павлею. Поминайте моя узы. Благодать со всеми вами. Аминь.

Аллилуя, глас 1: Исповедят Небеса чудеса Твоя, Господи.

Евангелие от Луки, зачало 51.

Рече Господь Своим учеником: слушаай вас, Мене слушает, и отменяйся вас, Мене отменяется, отменяйся же Мене, отменяется Пославшаго Мя. Возвратишася же семьдесят с радостию, глаголюще: Господи, и беси повинуются нам о имени Твоем. Рече же им: видех сатану яко молнию с небесе спадша. Се, даю вам власть наступати на змию и на скорпию и на всю силу вражию, и ничесоже вас вредит. Обаче о сем не радуйтесь, яко дуси вам повинуются, радуйтесь же, яко имена ваша написана суть на небесех. В той час возрадовася духом Иисус и рече: исповедаются, Отче, Господи небесе и земли, яко угаил еси сия от премудрых и разумных, и открыл еси та младенцем, ей, Отче, яко тако бысть благоволение пред Тобою.

Причастен: Во всю землю изыде вещание их и в концы вселенныя глаголы их.